


Merima IBRIĆ, MA

Zavod za zaštitu i korištenje kulturno-historijskog i prirodnog naslijeđa TK

**ZBORNİK RADOVA SA NAUČNOG SKUPA: „50 GODINA
NAUČNOG I PEDAGOŠKOG RADA PROFESORA EMERITUSA
SALIHA KULENOVIĆA“, ZAVOD ZA ZAŠTITU I KORIŠTENJE
KULTURNO-HISTORIJSKOG I PRIRODNOG NASLIJEĐA TK ,
Tuzla 2020.**



Zbornik radova, profesora emeritusa Saliha Kulenovića, iz štampe je izašao 2020. godine. Zbornik nosi naziv: „*Pedeset godina naučnog i pedagoškog rada*“. Izdavač ove publikacije je *JU Zavod za zaštitu i korištenje kulturno-historijskog i prirodnog naslijeđa TK-a*.

Naučni skup sa zbornikom radova sa međunarodnog učešća, održan je u Tuzli, dana 31.10. 2019. godine. Urednici zbornika radova su dr. sc. Semir Hadžimusić i Munisa Kovačević, prof. Zbornik je napisan na 234. stranice i donosi nam 17. kvalitetnih radova.

U prvom radu Semir Hadžimusić i Munisa Kovačević donose detalje iz bogate biografije naučnika u čiju čast je upriličen ovaj naučni skup. Kao što autori navode, profesor Kulenović je stručna zvanja stekao i u Muzeju istočne Bosne, a sva naučna znanja je stekao na Univerzitetu u Tuzli, gdje je 2012. godine dobio počasno zvanje prof. emeritus. Na kraju ovog teksta dat je izvod iz bibliografije koji uključuje popis većine objavljenih stručnih radova, kao i recenzije, projekte, elaborate i studije. Prema riječima autora, Salih Kulenović je kroz svoj pedesetogodišnji, stručni, naučni i pedagoški rad dao značajan

doprinos u podizanju stručnog, nastavnog i naučno-istraživačkog kadra. Također je istaknuto u spomenutom radu, da je dao nemjerljiv doprinos afirmaciji i razvoju muzeja Istočne Bosne u Tuzli, kao i sveukupno istraživanje valorizaciji i afirmaciji kulturno - historijskog naslijeđa BiH.

Drugi rad nam donosi teme iz nekoliko naučnih oblasti: etnologije, antropologije, geografije, demografije. Prof.dr. Izet Ibreljić nam je prikazao Kulenovićev istraživački rad i njegovo duboko uvjerenje o tome da bi se BiH trebala da razvija jedino kao demokratska regionalna država u skladu sa uobičajenim eurostandardima. Ibreljić naglašava Kulenovićev angažman na tom planu u okviru mnogih simpozija evropske asocijacije regionalnih nauka.

prof. dr. Azem Kožar u svom radu „Sa prof. dr. Salihom Kulenovićem na Odsjeku za historiju-geografiju Filozofskog fakulteta Univerziteta u Tuzli“ poseban akcenat stavlja na rad Filozofskog fakulteta, Odsjeka za historiju i geografiju, gdje ističe da je doprinos ovom odsjeku na Filozofskom fakultetu dao prof. dr. Salih Kulenović i kao šef odsjeka i kao nastavnik, na čemu su mu zahvalne dugogodišnje kolege i saradnici.

Sljedeći rad u nizu široke lepeze istaknutih radova je i rad prof. dr. Seada Selimovića. Također, kao i Kožar govori o doprinosu prof. dr. Saliha Kulenovića, afirmaciji Odsjeka za historiju i geografiju Filozofskog fakulteta, Univerziteta u Tuzli i podizanju stručnog i naučnog kadra. U tekstu posebno ističe da je prof. Kulenović dao nemjerljiv doprinos u podizanju stručnog kadra, kao nastavnik, mentor ili član komisije za odbranu diplomskih, magistarskih i drugih radova.

Ovoj grupi istaknutih autora koji su pisali o emeritusu Salihu Kulenoviću, pridružuju se još dva značajna imena, mr. sc. Dževad Tosunbegović i dr. sc. Izet Hadžić. Oni nam govore o Kulenovićevom političko-društvenom životu R. BiH i naroda, govore o Kulenoviću kao jednom od osnivača stranke Demokratske akcije. Također, ističu značajne aktivnosti prof. dr. Saliha Kulenovića i doprinos u odbrani Tuzle i regije, Sjeveroistočne Bosne, kao i njegov doprinos zaživljavanja i rada organa i institucija Republike BiH.

Osvrt na Kulenovićev naučni rad dao je i prof. dr. Semir Ahmetbegović. Ahmetbegović ističe da je prof. Kulenović čovjek kulture, struke i nauke. Profesr Kulenović je prema riječima Ahmetbegovića predstavljao Odsjek za geografiju, učestvovao u radu na brojnim međunarodnim seminarima, simpozijima, konferencijama i kongresima na području BiH, ali i susjednim zemljama i Evropi.

Ono što je posebno zanimljivo je i činjenica da je i Davorin Taslidžić, profesor koji dolazi iz Hrvatske dao svoje mišljenje o djelovanju i radu prof.

emeritusa Saliha Kulenovića. Taslidžić ističe važnost njegovog znanstvenog, pedagoškog, stručnog i javnog djelovanja. Profesor Kulenović, prema riječima Taslidžića, ima temeljnoga udjela u zblizavanju naših regijskih prostora i naučnog dijaloga sa naučnicima iz susjednih zemalja. Od ogromne je koristi emeritusova skrb o njegovanju odnosa i susreta Baranja – Tuzla, jer oni doprinose sklapanju novih prijateljstava i unapređivanja na našim i susjednim prostorima.

Sljedeći autor koji je dao svoj osvrt na Kulenovićev cjelokupni opus jeste i prof.dr. Nusret Mujagić, dipl. ing. arh. Mujagić govori o izuzetno bogatom znanju prof. Kulenovića, o njegovim idejama i specifičnom pedagoškom radu, koji je svojim studentima nesebično dijelio svoja zvanja i iskustvo, sa puno ljubavi i entuzijazma, motivirajući ih da budu što kvalitetniji, napredniji i plemenitiji.

Na bogati naučni opus Saliha Kulenovića, dali su osvrt i docent dr. Zlatko Đukić i Davorin Taslidžić kroz jedan koautorski rad. Oni između ostaloga akcenat stavljaju na polje etnologije, tim prije što je doktorsku disertaciju odbranio sa temom: *Antropogeografske i etnološke odlike Gračanice i okoline*. Kulenović je istraživao ne samo prostor svojega djelovanja već i širu panoniju kao i Tuzlanski prostor u zemljopisnom pogledu.

Muzejska savjetnica, Vesna Isabegović, piše o doprinosu emeritusa Kulenovića afirmaciji Muzeja istočne Bosne i prikupljanju eksponata čime su znatno obogaćene muzejske zbirke. Dr. Salih Kulenović je u Muzeju istočne Bosne radio 1971-1991. god, najprije kao kustos pripravnik, a nakon toga je stekao sva muzejska zvanja od kustosa preko višeg kustosa do muzejskog savjetnika. U prilogu ovog rada nalaze se i tri fotografije iz perioda muzejskog rada profesora Kulenovića.

Prof. dr. Omer Hamzić je iznio bilješke o djelovanju prof. dr. Saliha Kulenovića na području Gračanice s posebnim osvrtom na značaj njegovog djela za buduća antropološka istraživanja na prosotoru sjeveroistočne Bosne. Prema njegovim riječima, Kulenović se aktivno bavio proučavanjem kulturne historije Gračanice. Rezultat tih istraživanja je izuzetno važna knjiga za Gračanicu pod naslovom: " *Antropogeografske i etnološke karakteristike općine Gračanica* ", te najmanje još desetak vrijednih studija iz te oblasti.

Docent dr. Tarik Nuhanović u tekstu: „*Tradicijska porodica Trebave-poetika*“, prof. Kulenovića, prikazuje analizu etnoloških odlika stanovništva. Poseban osvrt je dao na Kulenovićevu knjigu: *Gračanica i okolina antropogeografske i etnološke oblike*. U radu su obrađene cjeline: porodica, tradicionalna porodica, porodica trebave-model, rezultati istraživanja tehnike

pisanja i pripovijedanja prof. Kulenovića, uživanje u životu, knjigama, vjeri, multikulturizam, emocije, koja je snaga pisane riječi.

Također, interesantan osvrt na Kulenovićev naučni opus dao je i dr .sc. Damir Džafić koji nam u svom tekstu govori o Kulenoviću kao naučniku koji je ostavio duboki trag i dao ogroman doprinos razvoju mnogih nauka, zatim profesionalnom razvoju velikog broja ličnosti. Demografija je samo jedna od nauka čijem je razvoju kroz istraživanja i objavljivanje rezultata tih istraživanja prof. Kulenović dao veliki doprinos.

Jedan od autora je i mr. Edin Šaković, koji je predstavio Gračanicu u naučno-istraživačkom djelu Saliha Kulenovića, ističući da je prof. Kulenović učvrstio temelje kasnijim istraživanjima prostora Gračanice i njene okoline. Isto tako navodi da je došlo do izražaja sa pokretanjem časopisa za kulturnu historiju: "*Gračanički glasnik*, 1996. godine.

Također, zanimljiv osvrt kroz tekst "*Perespektivni rezervat Kanjon Rakitnice*" dao je i prof. dr. Alen Lepirica. U radu su precizno navedeni geomorfološki i hidrološki spomenici i njihiva lokacija.

Sljedeći tekst pod nazivom "*Naselje Kupres i okolina krajem osmanske uprave*" govori nam o historijsko-geografskim karakteristikama naselja na Kupreškom polju krajem osmanske uprave. Uglavnom se koriste do sada nepoznati podaci iz osmanskog popisa stanovništva iz 1850.g. Tekst su napisali mr. sc. Rusmir Djedović i mr. sc. Kemal Nurkić.

O porijeklu, tradiciji, genealogiji, društvenom i imovinskom statusu Begovske porodice od kraja 17. do polovine 20. stoljeća, govori nam svakako prof.dr Salih Kulenović, emeritus i mr .sc. Nihad Kulenović, diplomirani pravnik. Oni ističu da su Kulenovići stara bosanska plemićka porodica, čije prisustvo i njihove aktivnosti u BiH i šire možemo pratiti na osnovu očuvane tradicije još od 1447. godine, a kroz historijske izvore od Karlovačkog mira 1699 god., pa na ovamo. Geneološko stablo Kulenovića, prema njihovim riječima je na osnovu kazivanja pripadnika ove porodice uradio Kosta Horman, za vrijeme Austrougarske uprave, a i cjelovito stablo kasnije s posebnim osvrtom na Kulenoviće. Ono što je posebno zanimljivo da kroz čitavo vrijeme postojanja kapetanija, kapetani Kulenovići su bili na čelu.

Iz svega navedenoga možemo zaključiti da je prof.dr. Salih Kulenović, emeritus, eminentna intelektualna ličnost kako našeg kantona tako i cijele naše države BiH, ali i šire regije. Profesor Kulenović dao je veliki doprinos razvoju Univerziteta u Tuzli, Filozofskom i Prirodno-matematičkom fakultetu, nauci, kulturi i društveno-političkom životu BiH. Kulenović je u svom radnom

životnom vijeku dao nesebičnu podršku i znanje svim budućim intelektualcima, koji kroz svoje radove ističu naučni opus i podršku prof. dr. Saliha Kulenovića. Ono što možemo primjetiti jeste da je emeritus Kulenović, vrhunska ličnost Bosansko-hercegovačkog naučnog kruga, od kojeg možemo svakodnevno učiti kojim intelektualnim putem svaki pojedinac treba krenuti.